

四庫全書

集部

欽定四庫全書

御定佩文齋詠物詩選卷一百二十一

莊類 附山房

五言古

宿來公山房待丁大不至

唐孟浩然

夕陽度西嶺羣壑條已暝
松月生夜涼風泉滿清聽
樵人歸欲盡煙鳥栖初定
之子期宿來孤琴候蘿逕

遊南城韓氏莊

唐孟郊

初疑瀟湘水鑲在朱門中時見水底月動搖池上風清
氣潤竹木白光連虛空浪簇霄漢羽岸芳金碧叢何言
數畝間環泛路不窮願逐神仙侶飄然汗漫通

宿王耕雲山莊期衍師不至就題竹上

明張適

山館絕塵交惟容謝公屐洗酌松下泉題詩澗邊石吟
僧期不來掩琴坐岑寂貌此林外影雨餘正凝碧

五言律

春晚山莊率題

唐
盧照鄰

田家無四鄰，獨坐一園春。
鶯啼非選樹，魚戲不驚綸。
山水彈琴盡，風花酌酒頻。
年華已可樂，高興復畱人。

藍田山莊

唐
宋之問

宦遊非吏隱，心事好幽偏。
考室先依地，為農且用天。
輞川朝伐木，藍水暮澆田。
獨與秦山老，相歡春酒前。

侍宴長寧公主東莊應制

唐
李嶠

別業臨青甸，鳴鸞降紫霄。
長筵鵷鷺集，仙管鳳凰調。
樹

接南山近煙含北渚遙承恩咸已醉戀賞未還鑣

春日山莊

唐
韋述

初歲開韶月田家喜載陽晚晴搖水態遲景蕩山光浦
淨漁舟遠花飛樵路杳自然成野趣都使俗情忘

題李十四莊兼贈綦母校書

唐
孟浩然

聞君息陰地東郭柳林間左右澗澗水門庭緱氏山抱
琴來取醉垂釣坐乘閒歸客莫相待尋源殊未還

過故人莊

孟浩然

故人具雞黍邀我至田家
綠樹邨邊合青山郭外斜
開筵面場圃把酒話桑麻
待到重陽日還來就菊花

漢上題韋氏莊

唐岑參

結茅聞楚客卜築漢江邊
日落數歸鳥夜深聞叩舷
水痕侵岸柳山翠借厨煙
調笑提筐婦春來蠶幾眠

夜宴左氏莊

唐杜甫

風林纖月落衣露淨琴張
暗水流花徑春星帶草堂
檢書燒燭短看劒引杯長
詩罷聞吳詠扁舟意不忘

王侍御南原莊

唐賈島

買得足雲地
新栽藥數窠
峰頭盤一逕
原下注雙河
春寺閒眠久
晴臺獨上多
南齋宿雨後
仍許重來過

題朱郎中白都莊

宋王安石

瀟灑桐廬守
滄江寄一廛
山光隔釣岸
江氣雜炊煙
藜杖聽鳴櫓
籃輿看種田
清時須共理
此興在他年

趙氏南莊

元許衡

曉起北窓涼
清談戢羽觴
入簾花氣重
落地燕泥香
夢

裏青山小吟邊白日長
秋風載書籍相對築茅堂

宿因勝莊

元 薩都拉

竹院亦幽雅參禪媿未能
夢回僧枕雨花落佛龕燈
風響過牆竹窓搖挂樹藤
栽詩題素壁聊爾記吾曾

山莊即事

元 葉顥

策杖步松關銜杯看遠山
青鞵陪月去翠袖裏雲還
芳草斜陽外落花流水間
山林多樂意無夢到塵寰

山莊

元 金涓

青邨谿盡處林密隱孤莊石老莓苔路門深薜荔牆人
行秋葉滑鶴立晚松涼治畝農歸後蓑衣挂夕陽

過故人莊

明 樊 阜

山邨行處好偶過故人莊秋竹煙籠色寒花露浥香一
雞鳴矮屋雙鷺浴橫塘畱飲忘歸去陶然入醉鄉

五言排律

奉和幸韋嗣立山莊侍宴應制

唐 宋之問

樞掖調梅暇林園藝槿初入朝榮劍履退食偶琴書地
隱東巖室天迴北斗車旌門臨窳窳輦道屬扶疎雲罽
明丹壑霜笳徹紫虛水疑投石處谿似釣璜餘帝澤頒
卮酒人歡頌里閭一承黃竹詠長奉白茅居

奉和幸韋嗣立山莊侍宴應制

唐
李嶠

南洛師臣契東巖王佐居幽情遺綬冕宸眷屬樵漁制
下峒山蹕恩迴灞水輿松門駐旌蓋薜幄引簪裾石磴

平黃陸煙樓半紫虛雲霞仙路近琴酒俗塵踈喬木千
齡外懸泉百尺餘崖深經鍊藥穴古舊藏書樹宿搏風
鳥池潛縱壑魚寧知天子貴尚憶武侯廬

奉和幸韋嗣立山莊侍宴應制

唐
趙彥昭

賢族惟題里儒門但署鄉何如表巖洞宸翰發輝光地
在茲山曲家鄰邵水陽六龍駐旌罕四牡耀旂常北斗
臨台座東山入廟堂天高羽翼近主聖股肱良野竹池

亭氣邛花澗谷香
縱然懷豹隱空媿躡鶴行

奉和幸韋嗣立山莊侍宴應制

唐武平一

三光迴斗極萬騎肅鈞陳
地若遊汾水畋疑歷渭濱
圓塘水寫鏡遙樹露成春
絃奏魚聽曲機忘鳥狎人
築巖思感夢礮石想垂綸
落景搖紅壁層陰結翠筠
素風紛可尚元澤藹無垠
薄暮清笳動天文煥紫宸

奉和聖製幸玉真公主山莊因題石壁十韻之

作應制

唐王維

碧落風煙外，瑤臺道路賒。
如何連帝苑，別自有仙家。
此地迴鑿駕，緣谿轉翠華。
洞中開日月，窓裏發雲霞。
庭養冲天鶴，谿流上漢槎。
種田生白玉，泥竈化丹砂。
谷靜泉逾響，山深日易斜。
御羹和石髓，香飯進胡麻。
大道今無外，長生詎有涯。
還瞻九霄上，來往五雲車。

七言律

奉和初春幸太平公主南莊應制

唐
李嶠

主家山第接雲開
天子春遊動地來
羽騎參差花外轉
霓旌搖曳日邊迴
還將石溜調琴曲
更取峰霞入酒杯
鸞輅已辭烏鵲渚
簫聲猶繞鳳凰臺

奉和初春幸太平公主南莊應制

唐
沈佺期

主家山第早春歸
御輦春遊繞翠微
買地鋪金曾作埽
尋河取石舊支機
雲間樹色千重滿
竹裏泉聲百道飛

自有神仙鳴鳳曲併將歌舞報恩輝

侍宴安樂公主山莊應制

唐李適

平陽金榜鳳凰樓沁水銀河鸚鵡洲綵仗遙臨丹壑裏
仙輿暫幸綠亭幽前池錦石蓮花艷後嶺香爐桂蕊秋
貴主稱觴萬年壽還輕漢武濟汾遊

奉和幸安樂公主山莊應制

唐趙彥昭

六龍齊軫御朝曦雙鷁維舟下綠池飛觀仰看雲外聳
浮橋直見海中移靈泉巧鑿天孫渚孝筍能抽帝女枝

幸願一生同草樹年年歲歲樂於斯

奉和幸安樂公主山莊應制

唐 韋元旦

銀河南渚帝城隅帝輦平明出九衢刻鳳蟠螭凌桂邸
穿池疊石寫蓬壺簫暫下鈞天樂綺綴常懸明月珠
仙榜承恩歌既醉方知朝野更歡娛

奉和初春幸太平公主南莊應制

唐 蘇頲

主第山門起灞川宸遊風景入初年鳳凰樓下交天仗

烏鵲橋頭敞御筵
往往花間逢綵石
時時竹裏見紅泉
今朝扈蹕平陽館
不羨乘槎雲漢邊

侍宴安樂公主山莊應制

蘇頌

駸駸羽騎歷城池
帝女樓臺向晚披
露灑旌旗雲外出
風迴巖岫雨中移
當軒半落天河水
遶逕全低月樹枝
簫鼓宸遊陪宴日
和鳴雙鳳喜來儀

奉和初春幸太平公主南莊應制

唐李邕

傳聞銀漢支機石復見金輿出紫微
織女橋邊烏鵲起
仙人樓上鳳凰飛
流風入座飄歌扇
瀑水侵階濺舞衣
今日還同犯牛斗
乘槎共泛海潮歸

題平泉薛家雪堆莊

唐白居易

怪石千年應自結
靈泉一帶是誰開
蹙為宛轉青蛇項
噴作玲瓏白雪堆
赤日暑天長看雨
元陰臘月亦聞雷
所嗟地去都門遠
不得肩輿每日來

奉和思黯自題南莊見示兼呈夢得

白居易

謝家別墅最新奇，山展屏風花夾籬。
曉月漸沈橋脚底，晨光初照屋梁時。
臺頭有酒鶯呼客，水面無塵風洗池。
除却吟詩兩閒客，此中情狀更誰知。

題馬太尉華山莊

唐劉滄

別開池館背山陰，近得幽奇物外心。
竹色拂雲連嶽寺，泉聲帶雨出谿林。
一庭楊柳春光暖，三徑松蘿晚翠深。
自是功成閒劍履，西齋長卧對瑤琴。

題姑蘇凌處士莊

唐
韋莊

一簇林亭返照間，門當官道不曾關。
花深遠岸黃鸝鬧，雨急春塘白鷺閒。
載酒客尋吳苑寺，倚樓僧看洞庭山。
怪來話得仙中事，新有人從物外還。

新買疊石谿莊招景仁

宋
司馬光

一谿清水珮聲寒，兩岸莓苔錦繡斑。
三徑誰來卜鄰舍，千峰我已作家山。
鹿裘藜杖偏宜老，紫陌紅塵不稱閒。
早挈琴書遠相就，放朝爛醉白雲間。

過徐氏莊居

宋 沈與求

只著高冠不著纓，掉頭防我問功名。
數椽茅屋有時漏，一壑野田無具耕。
酒地定能容勝踐，墨畦終擬過平生。
叩舷歸去蒹葭鬧，後夜相思看月明。

漁莊

元 陳基

何處林塘好，卜鄰清江繞屋淨。
無塵定巢新燕，渾如客泛渚。
輕鷗不避人，楊柳作花香。
勝雪鱸魚上釣，白於銀春風無限。
滄浪意欲向汀洲賦采蘋。

夜宴范氏莊

元 楊維禎

南弁山間多翠微
池塘處處涵清暉
丹泉釀酒名千日
花樹成窠大十圍
童子單衣碧鶴立
美人兩袖彩鸞飛
臨分更作嬉春約
賸載紅船白苧衣

次韻沈陶菴題有竹莊

明 張淵

愛汝石田茅屋好
依然風物似斜川
白蘋洲渚滄江外
紅樹園林夕照邊
艇子打魚偏趁月
山童洗藥每臨泉
老夫欲問東家住
分取瓜疇數畝煙

暮春初過山莊

明 李先芳

山人本性愛山居，弭節春遊過草廬。
短砌雨餘芳草合，小亭風定落花初。
拂塵下榻驚梁燕，開篋抽書走壁魚。
更闢巖扉頻灑掃，能無長者命巾車。

五言絕句

春莊

唐 王勃

山中蘭葉徑城外，李桃園直知人事靜。
不覺鳥聲喧

題張處士山莊

唐 杜牧

好鳥疑敲磬風蟬認軋箏
修篁與嘉樹偏倚半巖生

七言絕句

奉和聖製幸韋嗣立山莊應制

唐李嶠

萬騎千官擁帝車
八龍三馬訪仙家
鳳凰原上窺青壁
鸚鵡杯中弄紫霞

奉和聖製幸韋嗣立山莊應制

唐李乂

曲榭迴廊繞澗幽飛泉噴水溢池流祇應感發明王夢
遂得邀迎聖主遊

奉和聖製幸韋嗣立山莊應制

唐蘇頲

樹色參差隱翠微泉流百尺向空飛傳聞此處投竿住
遂使茲辰扈蹕歸

奉和聖製幸韋嗣立山莊應制

唐武平一

鳴鑾奕奕下重樓羽蓋逍遙向一丘漢日惟聞白衣寵
唐年更覩赤松遊

和裴令公南莊一絕

裴云野人不識中書令喚作陶家與謝家

唐白居易

陶廬僻陋那堪比謝墅幽微不足攀何似嵩峰三十六
長隨申甫作家山

題吉澗盧拾遺莊

唐韋莊

主人西遊去不歸滿谿春雨長春薇怪來馬上詩情好

印破青山白鷺飛

石壁寺山房即事

宋 沈與求

望斷南岡遠水通
客檣來往酒旗風
畫橋依約垂楊外
映帶殘霞一抹紅

懷山莊子仁姪

宋 楊萬里

危亭獨上忽徬徨
欠箇山莊墮我傍
却是向來相聚日
老懷未解憶山莊

白莊道中

金 党懷英

暖風遲日弄春晴
渾似龍眠畫裏行
沙路半隨堤尾曲
幾家桃李鶯鶯鳴

題雞鳴山房

明 蔡羽

山浮寒碧水浮花
石壁蒼蒼竹樹斜
愛爾玉京秋色好
白雲頭上看人家

山浮寒碧水浮花
石壁蒼蒼竹樹斜

御定佩文齋詠物詩選卷一百二十一

欽定四庫全書

集部

御定佩文齋詠物詩選卷一百二十七

詳校官侍郎_臣李 紱

主事銜_臣徐以坤覆勘

總校官檢討_臣 何思鈞

校對官中書_臣 陸 湘

騰錄監生_臣 陳琴高

欽定四庫全書

御定佩文齋詠物詩選卷一百二十二

園林類

五言古

夜遊北園

梁簡文帝

星芒侵嶺樹月暈隱城樓
暗花舒不覺明波動見流

遊韋黃門園

簡文帝

息車冠蓋里停轡仲長園
檐疎遠興積賓至羽觴繁

從皇太子出玄圃應令

梁庾肩吾

春光起麗譙屣步陟山椒閣影臨飛蓋鷲鳴入洞簫水
還登故渚樹長蔭前橋綠荷生綺葉丹藤上細苗顧循
慚振藻何用擬瓊瑤

奉和初秋西園應教

北齊蕭愨

池亭三伏後林館九秋前清泠間泉石散漫雜風煙藻
開千葉影樛艷百枝然約嶺停飛旆凌波動畫船

南園

唐元稹

清露夏天曉名園野氣通
水禽遙泛雪池蓮迴披紅
幽林詎知暑環舟似不窮
頓灑塵喧意長嘯滿襟風

郡中西園

唐白居易

閒園多芳草春夏香靡靡
深樹足佳禽旦暮鳴不已
院門閉松竹庭逕穿蘭芷
愛彼池上橋獨來聊徙倚
魚依藻長樂鷗見人暫起
有時舟隨風盡日蓮照水
誰知郡府內景物閒如此
始悟諠靜緣何嘗係遠邇

和裴侍中南園靜興見示

白居易

池館清且幽高懷亦如此有時簾動風盡日橋照水靜
將鶴為伴閒與雲相似何必學畱侯崎嶇覓松子

次韻答弒老獨遊東園

宋 黃庭堅

主人心安樂花竹有和氣時從物外賞自益酒中味
斲枯蟻改穴掃箨筍迸地萬籟寂中生乃見風雨至

曉出西園由谷中歸

元 甘復

被褐涉西園煩襟散清曉微風動高樹零露下芳沼始
行幽谷中忽出青林杪流水漂餘花修筠度啼鳥身緣

翠石回思逐白雲
香負杖孤賞懷春
闌綠陰悄

七言古

邵郎中姑蘇園亭

宋梅堯臣

吟愛樂天池上篇
買池十畝皆種蓮
薄城萬竿竹嬋娟
藤纜繫橋青板船
折腰大菱不值錢
鳩鵲鷓鴣沙際眠
水從太湖根底穿
月出洞庭山上圓
公歸與客相留連
秋風鶴唳春杜鵑
斑鱸斫繪紅縷鮮
紫豉煮蓴香味全
我思白傳在三川
吳船雖有吳饌偏
當時九老各華顛

裴令來過吟復聯至今怪石存舊鐫七葉樹蔭黃金田
羨公有子勝昔賢高門通車千萬年

五言律

春日侍宴幸芙蓉園應制

唐李嶠

年光竹裏徧春色杏間遙煙氣籠青閣流文蕩畫橋飛
花隨蝶舞艷曲伴鶯嬌今日陪歡豫還疑陟紫霄

春日侍宴幸芙蓉園應制

唐李乂

水殿臨丹籞山樓繞翠微昔遊人託乘今幸帝垂衣澗

篠綠峰合巖花逗浦飛朝來江曲地無處不光輝

春日侍宴幸芙蓉園應制

唐 宋之問

芙蓉秦地沼盧橘漢家園谷轉斜盤徑川迴曲抱原風
來花自舞春入鳥能言侍宴瑤池夕歸途騎吹繁

崔禮部園亭

唐 張說

窈窕留清館虛徐步晚陰水連伊闕近樹接夏陽深柳
蔓憐垂拂藤梢愛上尋訝君軒蓋侶非復俗人心

春園即事

唐 王維

宿雨乘輕屐春寒著敝袍
開畦分白水間柳發紅桃
草際成棋局林端舉桔槔
還持鹿皮几日暮隱蓬蒿

題張野人園廬

唐

孟浩然

與君園廬並微尚頗亦同
耕釣方自逸壺觴趣不空
門無俗士駕人有上皇風
何必先賢傳唯稱龐德公

晚歸東園

唐

李頎

荆扉帶郊郭稼穡滿東菑
倚杖寒山暮鳴梭秋葉時
迴雲覆陰谷返景照霜梨
澹泊真吾事清風別自茲

陪鄭廣文遊何將軍山林

唐杜甫

不識南塘路今知第五橋
名園依綠水野竹上青霄
谷口舊相得濠梁同見招
平生為幽興未惜馬蹄遙

其二

百頃風潭上千章夏木清
卑枝低結子接葉暗巢鶯
鮮鯽銀絲膾香芹碧澗羹
翻疑舵樓底晚飯越中行

其三

風磴吹陰雪雲門吼瀑泉
酒醒思卧簟衣冷欲裝綿
野

老來看客河魚不取錢只疑淳朴處自有一山川

其四

牀上書連屋階前樹拂雲將軍不好武稚子總能文
醒酒微風入聽詩靜夜分締衣挂蘿薜涼月白紛紛

重過何氏

杜甫

問訊東橋竹將軍有報書倒衣還命駕高枕乃吾廬
花妥鶯捎蝶谿喧獺趁魚重來休沐地真作野人居

其二

山雨樽仍在沙沈榻未移
犬迎曾宿客鴉護落巢兒
雲薄翠微寺天清皇子陂
向來幽興極步屨過東籬

其三

落日平臺上春風啜茗時
石欄斜點筆桐葉坐題詩
翡翠鳴衣桁蜻蜒立釣絲
自今幽興熟來往亦無期

其四

頗怪朝參懶應耽野趣
長雨拋金鑠甲苔卧綠沈
槍手自移蒲柳家纔足
稻粱看君用幽意白日到羲皇

寧王山池

唐范朝

水勢臨階轉峰形對路開
槎從天上得石是海邊來
瑞草分叢種祥花間色栽
舊傳詞賦客惟見有鄒枚

奉和元相公家園即事寄王相公

唐韓翃

共列中台貴能齊物外心
迴車青閣晚解帶碧茸深
寒水分畦入晴花度竹尋
題詩更相憶一字重千金

題鮮于映林園

唐司空曙

雨後園林好幽行迥野通遠山芳草外流水落花中
容醉悠悠慣鶯啼處處同夕陽自望遠日暮杜陵東

題李沆林園

唐盧綸

古巷牛羊出重門接柳陰閒看入竹路自有向山心
種藥齊幽石耕田到遠林願同詞賦客得興謝家深

春日同諸公過兵部王尚書林園

唐權德輿

休沐君相近時容曳履過花間留客久臺上見春多
松

色明金艾鶯聲雜玉珂更逢新酒熟相與藉庭莎

題從叔沆林園

唐李端

阮宅閒園暮窓中見樹陰樵歌依遠草僧語過長林
鳥上花間井人彈竹裏琴自嫌身未老已有住山心

題崔端公園林

李端

上士愛清暉開門向翠微抱琴看鶴去枕石待雲歸
野坐苔生席高眠竹挂衣舊山東望遠惆悵暮花飛

春園即事

唐陳羽

水隔羣物外夜深風起頻霜中千樹橘月下五湖人聽
鶴忽忘寢見山如得鄰明年還到此共看洞庭春

題鄒處士隱居

唐許渾

桑柘滿江邨西齋接海門浪衝高岸響潮入小池渾巖
樹蔭碁局山花落酒樽相逢每留宿還似識王孫

初夏題段郎中修竹里南園許渾

高人遊息處與此曲池連密樹纔春後深山在目前遠
峰初歇雨片石欲生煙數有僧來宿應緣靜好禪

園居

唐 李 郢

暮雨揚雄宅秋風向秀園
不聞砧杵動時看桔槔翻
釣下魚初食船移鴨暫喧
橘寒纔弄色須帶早霜繁

小園

唐 李建勳

小園吾所好栽植忘勞形
晚果經秋赤寒蔬近社青
竹蘿荒引蔓土井淺生萍
更欲從人勸憑高置草亭

陳氏園林

唐 鄭 巢

當門三四峰高興幾人同
尋鶴新泉外留僧古木中
蟬

苗如草長巖溜入池清欲識懷君意時聞鶴一鳴

春日遊張提舉園池

宋 徐璣

西野芳菲路春風正可尋山池依曲渚古渡入修林長
日多飛絮遊人愛綠陰晚來歌吹起惟覺畫堂深

後浦園廬

宋 戴敏

卜築成佳致幽棲樂聖時何如謝公墅略似習家池地
暖梅開早天寒酒熟遲催租人去後續得夜來詩

題董侍郎山園

宋 戴復古

行盡芙蓉徑尋秋叩竹關樓高納萬象木落見羣山
野水雲際畫橋煙雨間紅塵城下路只隔一湖灣

家園

金周昂

五畝園連竹三間屋向陽氣和春浩蕩心靜日舒長
花鳥成相識琴書付兩忘陶然一樽酒誰復紀羲皇

過潘韞輝東園

明李幾

為愛東園好春來事事宜藥名人不識花信蝶先知
晉帖臨青李商歌詠紫芝小車乘興往何必訂幽期

春日陪孟東洲憲使公重過宋氏園亭

明馮惟訥

竹色青於染春生宋玉家
衆山當戶出一水抱城斜
積雨翻高柳輕寒勒早花
風光正如此莫惜醉流霞

春園

明謝榛

水邨人寂寂遲日啟柴關
菜甲春初細園丁雨後閒
沙邊來白鳥柳外出青山
此地多幽意行歌薄暮還

周氏園亭

明俞允文

紫紺琳宮側芳園麗景回焚香青靄聚洗硯白雲開橘
想靈均什亭堪內史才更憐花逕裏月色夜深來

初夏園林即事

明
胡宗仁

夏入園林好欣逢霽景明藥闌香醉蝶柳岼綠迷鶯道
在心逾逸情閒跡自清夕陽紅欲盡一抹暮山橫

五言排律

同二相已下羣官樂遊園宴
唐明皇

撰日巖廊暇需雲宴樂初萬方朝玉帛千品會簪裾地

入南山近城分北斗餘池塘垂柳密原隰野花疎帶幕
看逾暗歌鐘聽自虛興闌歸騎轉還奏弼違書

恩賜樂遊園宴

唐張說

漢苑佳遊地軒庭近侍臣共持榮幸日來賞艷陽春饌
玉頌王篚縱金下帝鈞池臺草色徧宮觀柳條新花綬
光連榻朱顏暢飲醇聖朝多樂事天意每隨人

三月二十日詔宴樂遊園賦得風字

張說

樂遊形勝地表裏望郊宮北闕連天頂南山對掌中皇
恩貸芳月旬宴美成功魚戲芙蓉水鶯啼楊柳風春光
看欲暮天澤戀無窮長袖招斜日留光待曲終

題少府監李丞山池

唐李頎

能向府亭內置茲山與林他人驕驕馬而我薜蘿心兩
止禁門肅鶯啼宮柳深長廊闕軍器積水背城陰窓外
王孫草牀頭中散琴清風多仰慕吾亦爾知音

和李僕射西園

唐張籍

過午歸閒處西庭敞四檐高眠著琴枕散帙檢書籤印
在休通客山晴好捲簾竹涼蠅少到藤暗蝶爭潛晚鵲
頻驚喜疎蟬不許拈石苔生紫點欄藥吐紅尖虛坐詩
情遠幽探道侶兼所營當勝地雖儉復誰嫌

題崔駙馬園林

唐姚合

東園連宅起勝事與心期幽洞自生藥新篁迸入池密
林行不盡芳草坐難移石翠疑無質鶯歌似有詞莎臺
高出樹蘚僻淨題詩我獨多來此九衢人不知

寄題田待制廣州西園

宋 余靖

善政偏修舉增完池館清地含春氣早月映暮潮生石
有羣星象花多外國名與民同雉兔邀客醉蓬瀛翰墨
資吟興雲泉適野情鎮應持左蠲快欲繪長鯨積靄藏
樓閣馴鷗識旆旌甘棠留美蔭高倚越王城

猗綠園

元 馬祖常

殖產吾何取開林我獨能縛船常取竹擣紙每移藤池
曲波濤小花繁霧雨蒸春雲同礎潤秋月共江澄鳳下

非因食魚來不可曾寫經還道士裹飯乞行僧筍屨新
青折荷衣舊翠凝浮甌茶有乳溢甕酒無冰香爇留文
篆詩囊剩繚綾清晨餐玉罷東望日初升

七言律

題張逸人園林

唐
韓翃

藏頭不復見時人愛此雲山奉養真露色點衣孤嶼曉
花枝妨帽小園春悶攜幼稚諸峰上閒濯鬚眉一水濱
興罷歸來還對酌茅檐挂著紫荷巾

題元注林園

唐李端

謝家門館似山林，碧石青苔滿樹陰。
乳鵲貯巢花巷靜，鳴鳩鼓翼竹園深。
桔槔轉水魚通藥，方丈留僧共聽琴。
獨有野人箕踞慣，過君始得一長吟。

遊東湖黃處士園林

唐劉威

偶向東湖更向東，數聲雞犬翠微中。
遙知楊柳是門處，似隔芙蓉無路通。
樵客出來山帶雨，漁舟過去水生風。
物情多與閒相稱，所恨求安計不同。

暮春康樂園

宋韓琦

榆莢紛紛擲亂錢
柳花相撲滾新綿
一年寂寞頻來地
三月芳菲已過天
樹密只喧閒鳥雀
臺高猶得好山川
老夫不飲時如此
徒有詩情益自然

上已訪楊廷秀賞牡丹於御書扁榜之齋其東園僅一畝為街者九名曰三三徑意象絕新

宋周必大

楊監全勝賀監家
賜湖豈比賜書華
迴環自刷三三徑

頃刻常開七七花門外有田聊伏臘望中無處不煙霞
只慚下客非摩詰無畫無詩只漫誇

積芳圃

宋朱子

樂事從茲不易涯朱門還似野人家行看靚艷須携酒
坐對清陰只煮茶曉起蒼涼承墜露晚來光景亂蒸霞
平生結習今餘幾試數毗那襪上花

再次秀野躬耕桑陌舊園之韻 朱子

江臯晴日麗芳華翠竹疎疎映白沙路轉忽逢沽酒客

眼明惟見滿園花
望中景助詩人趣
物外春歸釋子家
向晚却尋芳草徑
夕陽流水遠村斜

次秀野韻

朱子

使君簾閣對修筠
起看名園雨後春
便賦新詩留野客
更傾芳酒酌花神
未酬管樂平生志
且作羲皇向上人
祇恐功名相迫逐
不容老子卧漳濱

其二

滿園紅紫已爭新
百轉幽禽亦喚人
蠟屐未妨泥步穩

珍叢終恨雨來頻
卧看曉色欣初霽
起約良游醉好春
却笑當年金谷宴
相隨僕僕望車塵

春日小園雜賦

宋陸游

市塵不到放翁家
繞麥穿桑野徑斜
夜雨長深三尺水
曉寒留得一分花
悶從鄰舍分春瓮
閒就僧窓試露芽
自此年光應更好
日驅秧馬聽縑車

小園

陸游

窄窄柴門短短籬
山家隨分有園池
客因問字來携酒

僧趁分題就賦詩
晨露每看花蕊拆
夕陽頻見樹陰移
拂衣司諫猶忙在
此趣淵明却少知

山園

陸游

山泉引派漲清池
野蔓移根種短籬
藝粟極知非老事
接花聊復效兒嬉
提壺言語開顏聽
啄木衣襦緩步窺
莫笑題詩還滿紙
小園幽事要君知

初夏遊凌氏小園

陸游

水滿池塘葉滿枝
曲廊危榭愜幽期
風和海燕分泥處

日永吳蠶上簇時
閒理阮咸尋舊譜
細傾白墮賦新詩
從來夏淺勝春日
兒女紛紛豈得知

新闢小園

陸游

新展山園半畝強
笑人車馬出籠坊
山禽乍暖慙懃語
野鷺無風自在香
點點水紋迎細雨
疎疎籬影界斜陽
出門遙向鄰翁說
釋耒相從共一觴

陳侍御園上坐

宋范成大

倦眼逢歡春水明
詩情得酒春雲生
花梢蝴蝶作團去

竹裏鶉鳩相對鳴
邂逅浮生此日好
纏綿俗累何時輕
擘箋沫墨乏奇句
擷笛當筵慚妙聲

小園

宋戴敏

小園無事日徘徊
頻報家人送酒來
惜樹不磨修月斧
愛花須築避風臺
引些渠水添池滿
移箇柴門傍竹開
多謝有情雙白鷺
暫時飛去又飛回

西園得西字

金馮延登

芳徑層巒百鳥啼
芝屨蘭畹自成蹊
仙舟倒影涵魚藻

畫棟飄香落燕泥
淑景晴熏紅樹暖
好風輕泛碧叢低
岡頭醉夢俄驚覺
歌吹誰家在竹西

西園書事

明 高 啟

西園春去綠陰成
已覺南窓枕簟清
簾捲斜陽歸燕入
池生芳草亂蛙鳴
葉過穀雨花猶在
衣近梅天潤易生
獨坐正知閒晝永
吟餘消盡篆煙輕

次韻寄題鏡川先生後樂園

明 李東陽

藥欄花圃背堂開
一日朝回幾度來
范老心終念廊廟

寇公家不起樓臺海邊釣石鷗盟遠松下暮聲鶴夢回
多少舊題詩句在碧紗籠底認青苔

晚雨飲子重園亭

明文徵明

高齋落日偶追從樽酒淹留一笑中芳草滿庭飛燕子
晚涼和雨滴梧桐江魚繞筴肥烹玉野樹藏春淺映紅
潦倒莫言歸更晚習家池館愛山公

春夕潘園

明楊慎

雨砌風檐墮棟花蟲書鳥字徧晴沙春山載酒馳朝馬

江閣邀賓起暮鴉陶令葛巾從滲漉管寧紗帽任敲斜
殊方未覺追隨盡韋曲風流更爾家

遊徐公子西園

明

蔡汝楠

西園飛蓋月中遊隨意登攀自可留門徑近連馳道樹
池塘遙接漢宮流坐看虛牖明朱爨行見深松間畫樓
一自王孫開別第鳳臺花鳥不知秋

行後園新池

蔡汝楠

後園鑿沼愛漣漪日日行園人不知浴鳥參差雲宿處

戲魚來往芰搖時晚依巖岫分寒翠秋入芙蓉映倒枝
最是一泓清興足五湖情事寄臨池

張舜卿園亭

明許陞

綠陰深巷寂無譁小結茅亭玩物華花散餘香來客座
竹分新翠過鄰家錦袍垂手閒調鶴烏帽籠頭自煮茶
況值承平常偃武不妨詩酒作生涯

五言絕句

春園

唐王勃

山泉兩處晚花柳一園春還持千日醉共作百年人

南垞

唐王維

輕舟南垞去北垞淼難即隔浦望人家遙遙不相識

張郎中梅園作

唐孟浩然

綺席鋪蘭杜珠盤折芰荷故園留不住應是戀絃歌

絕句

唐杜甫

急雨捎谿足斜暉轉樹腰隔巢黃鳥並翻藻白魚跳

杉逕

宋朱子

南起雲關口縈紆上草堂
天風發清籟山月度寒光

六言絕句

田園樂

唐王維

采菱渡頭風急策杖林西日斜
杏樹壇邊漁父桃花源裏人家

其二

桃紅復含宿雨柳綠更帶朝煙
花落家僮未掃鳥啼山客猶眠

七言絕句

奉和聖製同玉真公主遊大哥山池題石壁

唐
張說

池如明鏡月華開
山學香爐雲氣來
神藻飛為鵲鴿賦
仙聲颺出鳳凰臺

和沈太博小圃偶作

宋
趙抃

名園雨後百花繁
人倚危樓十二闌
園裏芳菲樓上客
一般情緒怕春寒

其二

日烘薄霧開柔陌
風冒遊絲著柳條
語燕啼鶯自撩亂
驚人殘夢是春朝

書湖陰先生壁

宋王安石

茅簷長掃淨無苔
花木成畦手自栽
一水護田將綠繞
兩山排闥送青來

開園

宋蘇軾

西園牡籥夜沈沈
尚有遊人卧柳陰
鶴睡覺來風露下

落花飛絮滿衣襟

南園

蘇軾

不種天桃與綠楊使君應欲候農桑
春畦雨過羅紈膩
夏隴風來餅餌香

過靈壁張氏園

宋曾鞏

秣地成來多釀酒杏林熟後亦留錢
不須置驛迎賓客
直到門前繫畫船

春日偶作

宋朱子

聞道西園春色深，急穿芒屨去登臨。
千葩萬蕊爭紅紫，誰識乾坤造化心。

園中雜書

宋陸游

殘花委地筍掀泥，茗椀香囊到處携。
幽夢欲成誰喚起，半窓斜日鷓鴣啼。

花時徧遊諸家園

陸游

翩翩馬上帽檐斜，盡日尋春不到家。
偏愛張園好風景，半天高柳卧谿花。

飲張功父園戲題扇上

陸游

寒食清明數日中西園春事又匆匆
梅花自避新桃李
不為高樓一笛風

東園

宋僧道潛

曲渚回塘孰與期
杖藜終日自忘歸
隔林彷彿聞機杼
應有人家在翠微

遊何氏園

金馬定國

八尺龍蛇薜荔牆
瘦紅踈竹更蒼涼
梅花映水無人見

隔岸飛來片片香

邨園

元金涓

半畝邨園接水涯
誅茅新構小書齋
窓前不用栽花柳
只對青山景自佳

後園

明羅洪先

南邨雲雨北邨晴
晴鳩雨鳩更互鳴
東風吹雨衣不濕
我在桃花深處行

御定佩文齋詠物詩選卷一百二十二

欽定四庫全書

御定佩文齋詠物詩選卷一百二十三

別業類

五言古

題崔山人別業

唐

儲光羲

南陽隱居者築室丹谿源谿冷怯秋晏室寒欣景暎山
雞鳴菌閣水霧入衡門東嶺或舒嘯北窓時討論封君
渭川竹逸士漢陰園何必崆峒上獨為堯所尊

晦日遊大理韋卿城南別業

唐王維

與世澹無事自然江海人側聞塵外遊
解驂軼朱輪平野照暄景上天垂春雲
張組竟北阜泛舟過東鄰故鄉信高會
牢醴及佳辰幸同擊壤樂心荷堯為君

尋鞏縣南李處士別業

唐岑參

先生近南郭茅屋臨東川桑葉隱邨戶
蘆花映釣船有時著書暇盡日窓中眠
且喜閭井近灌田同一泉

過汪氏別業

唐李白

遊山誰可遊子明與浮丘壘嶺礙河漢連峰橫斗牛汪
生面北阜池館清且幽我來感意氣槌魚列珍羞掃石
待歸月開池漲寒流酒酣益爽氣為樂不知秋

潯陽陶氏別業

唐 劉昫虛

陶家習先隱種柳長江邊朝夕潯陽郭白衣來幾年霽
雲明孤嶺秋水澄寒天物象自清曠野情何綿聯蕭蕭
丘中賞明宰非徒然願守黍稷稅歸耕東山田

初至洞庭懷灞陵別業

唐 劉長卿

長安邈千里日夕懷雙闕已是洞庭人猶看灞陵月誰
堪去鄉思親戚想天末昨夜夢中歸煙波覺來闊江皋
見芳草孤客心欲絕豈訝青春來但傷經時別長天不
可望鳥與浮雲沒

五言律

終南別業

唐王維

中歲頗好道晚家南山陲興來每獨往勝事空自知行
到水窮處坐看雲起時偶然值林叟談笑無還期

酬虞部蘇員外過藍田別業不見留之作

王維

貧居依谷口喬木帶荒邨石路枉迴駕山家誰候門
漁舟膠凍浦獵火燒寒原惟有白雲外疎鐘聞夜猿

從岐王過楊氏別業應教

王維

揚子談經處淮王載酒過興闌啼鳥緩坐久落花多
逕轉迴銀燭林開散玉珂嚴城時未啟前路擁笙歌

宿岐州北郭嚴給事別業

唐岑參

郭外山色暝主人林館秋疎鐘入卧内片月到牀頭
遙夜惜已半清言殊未休君雖在青瑣心不忘滄洲

蘇氏別業

唐祖詠

別業居幽處到來生隱心南山當戶牖澧水映園林
竹覆經冬雪庭昏未夕陰寥寥入境外閒坐聽春禽

南谿別業

唐蔣冽

結宇依青嶂開軒對綠疇樹交花兩色谿合水重流
竹徑春來掃蘭樽夜不收逍遙自得意鼓腹醉中遊

潘司馬別業

唐周瑀

門對青山近汀牽綠草長寒深包晚橘風緊落垂楊湖
畔聞漁唱天邊數鴈行蕭然有高士清思滿書堂

和人秋歸終南山別業

唐錢起

舊居三顧後晚節重幽尋野徑到門盡山窓連竹陰昔
年鶯出谷今日鳳歸林物外凌雲操誰能繼此心

題樊川杜相公別業

錢起

數畝園林好人知賢相家結茅書閣儉帶水槿籬斜古

樹生春蘚新荷卷落花聖恩加玉鉉安得卧煙霞

題鄭侍御藍田別業

唐張喬

秋山清若水吟客靜於僧小徑通商嶺高窓見杜陵雲
霞朝入鏡猿鳥夜窺燈願作前峰侶終來寄上層

遊崔監丞城南別業

唐劉得仁

門與青山近青山復幾重雪融皇子岸春潤翠微峰地
有經冬艸林無未老松竹寒谿隔寺晴日直聞鐘

東谿別業寄段郎中

唐方干

前山含遠翠羅列在窓中盡日人不到一樽誰與同涼
隨蓮葉雨暑避柳條風豈分長岑寂明時有至公

冬日尋徐氏別業

唐僧皎然

近依城北住幽徑少人知積雪行深巷寒山遠故籬竹
花春自發橙實晚仍垂還共巖前鶴今朝下夕池

夏晚別墅

宋蔡襄

夏竹侍前楹涼襟析舊醞疊雲封日茜斜雨著虹明魚
動池開暈蟬移樹減清葭洲煙向暝鳧鷺自相迎

上湖閒泛艤舟石函因過下湖小墅

宋 林逋

平臯望不極雲樹遠依依及向扁舟泊還尋下瀨歸青
山連石埭春水入柴扉多謝提壺鳥留人到落暉

訪雲卿淮上別墅

宋 僧惠崇

地近得頻到相携向野亭河分岡勢斷春入燒痕青望
久人收釣吟餘鶴振翎不愁歸路晚明月上前汀

飲張氏別墅

元 揭傒斯

楚國多才俊張家好弟兄出門湖水碧留客野堂清微
雨鳴疎竹寒煙覆古城園人隔畦語歲暮此中行

清漳黃氏北墅

元陳旅

聞說黃家墅開門入翠嵐細岑依舍北流水出城南雨
暖蘭抽筍霜晴樹落柑千年讀書地更莫乞羊曇

別墅晚晴與鄰叟久立

明劉仔肩

郊原初雨歇散步出荆扉落日在高樹涼風生客衣佛
香僧舍近江影塞鴻飛亦有南鄰叟忘言相與歸

五言排律

冬至後過吳張二子檀谿別業

唐
孟浩然

卜築因自然，檀谿不更穿。
園廬二友接，水竹數家連。
直取南山對，非關選地偏。
卜鄰依孟母，共井讓王宣。
曾是歌三樂，仍聞詠五篇。
草堂時偃曝，蘭柵日周旋。
外事情都遠，中流性所便。
閒垂太公釣，興發子猷船。
余亦幽栖者，經過竊慕焉。
梅花殘臘日，柳色半春天。
鳥泊隨陽鴈。

魚藏縮項編停杯問山簡何似習池邊

七言律

春日題杜叟山下別業

唐 盧 綸

百鳥羣飛山半晴渚田相接有泉聲園中曉露青叢合
橋上春風綠野明雲影斷來峰影出林花落盡草花生
今朝醉舞同君樂始信幽人不愛榮

春宴王補闕城東別業

唐 郎士元

柳陌乍隨洲勢轉花源忽傍竹陰開能將瀑水清人境

直取流鶯送酒杯山下古松當綺席檐前片雨滴春苔
地主同聲復同舍留歡不畏夕陽催

酬王季友題半日邨別業兼呈李明府

郎士元

邨映寒原日已斜煙生密竹早歸鴉長谿南路當羣岫
半景東鄰照數家門通小徑連芳草馬飲春泉踏淺沙
欲待主人林上月還思潘令縣中花

秋晚自洞庭湖別業寄穆秀才

唐
皮日休

江邨寥落過重陽，獨自撷寧葺草房。
風捲紅蕉仍換葉，雨淋黃菊不成香。
野猿偷栗重窺戶，落鴈疑人更繞塘。
他日若修耆舊傳，為予添取此書堂。

張舍人南谿別業

唐
僧法振

新田遶屋半春耕，藜杖閒門引客行。
山翠自成微雨色，谿花不隱亂泉聲。
漁家遠到堪留興，公府懸知欲厭名。
入夜更宜明月滿，雙童喚出解吹笙。

題少保張公曲阿別墅

金王寂

鍾湖亭下水淙淙綠野平
泉未易雙十里藕花紅步障
一軒松蔭碧油幢洛中獨樂有司馬
天下不知名曲江紙尾欲煩賢
宅相雨菴添我坐蓬窓

自山中歸鑑湖別業

元吳景奎

數椽茅舍清江曲六月炎天困鬱蒸
賴有青山圍故宅歸來赤脚踏層水
石泉松籟為琴筑野菽山肴薦豆登
明日回頭望丘壑芙蓉半出白雲層

次韻奉題吳彥貞華林別業 明 吳會

郡城南去有華亭花木成林竹繞汀
照影鳳凰臨月鏡傳聲鸚鵡隔雲屏
分栽柳入陶潛傳點校茶歸陸羽經
我亦延州老孫子對江相望樂清寧

七言排律

許員外新陽別墅

唐 方干

蘭汀橘島映亭臺不是經心即手栽
滿閣白雲隨雨去一池寒月逐潮來
小松出屈和巢長新逕通邨避筍開

柳絮風前敲枕卧，荷花香裏釣魚迴。
園中認葉分靈草，檐下攀枝落野梅。
莫恣高情求逸思，須防急詔用長材。
若因螢火終殘卷，便把漁歌送幾盃。
多謝郢中賢太守，當時談笑許追陪。

五言絕句

題袁氏別業

唐
賀知章

主人不相識，偶坐為林泉。
莫謾愁沽酒，囊中自有錢。

七言絕句

戲題輞川別業

唐王維

柳條拂地不須折
松樹披雲從更長
藤花欲暗藏
猓子柏葉初齊養麝香

題柳谿別墅

金姚孝錫

雨霽風和不動塵
柳邊携酒賞晴春
頻來谿鳥渾相識
渡水穿花不避人

楓塘別業

元尹廷高

白雲缺處露檐牙
雞犬相聞僅數家
幽鳥不啼林寂寂

滿山黃霧落松花

御定佩文齋詠物詩選卷一百二十三

欽定四庫全書

御定佩文齋詠物詩選卷一百二十四

城郭類

五言古

晚登三山還望京邑

齊謝朓

灞涘望長安
河陽視京縣
白日麗飛甍
參差皆可見
餘霞散成綺
澄江靜如練
喧鳥覆春洲
雜英滿芳甸
去矣方滯淫
懷哉罷歡宴
佳期悵何許
淚下如流霰
有情知

望鄉誰能鬢不變

登城北望

梁
簡文帝

登樓傳昔賦出薊表前聞灞陵忽回首河堤徒望軍茲
馬聊迴眺極目杳難分一水斜開岸雙城遙共雲

登石頭城

梁
何遜

關城乃形勢地險差非一馬嶺逐紆回犬牙傍隆宰百
雉極襟帶億度兼量出至理歸無為善守竟何恤眺聽
窮耳目遠近備幽悉擾擾見行人暉暉視落日連檣入

迴浦飛蓋交長街
天暮遠山青
潮去遙沙出
薄宦惡師表
屬辭慚愈疾
願乘轂
棘牛還隱蒙
龍室

秋日登廣州城南樓

陳江總

秋城韻晚笛危榭
引清風
遠氣疑埋劍
驚禽似避弓
海樹一邊出
山雲四面通
野火初煙細
新月半輪空
塞外離羣客
顏鬢早如蓬
徒懷建鄴水
復想洛陽宮
不及孤飛鴈
獨在上林中

遊龍首城

陳張正見

關外山川闊城隅塵霧浮白雲凝絕嶺滄波間斷洲四面觀長薄千里眺平丘河津無桂樹樽酒自淹留

新霽登周王城

宋 梅堯臣

行行古城頭歷覽古城下水鳥傍人煙河流隔桑柘秋山豁晴翠野老親時稼民訟今已稀閒登殿官舍

七言古

附長短句

城南

宋 孔平仲

密州三月猶有寒地平更在大海上昨朝雨止氣已晴

今日繁陰北風壯城南
颯水傍城流幾處垂楊繫小舟
傳聞寂寂無車馬紅杏天桃各自稠

鄧州城樓

宋 陳與義

鄧州城樓高百尺楚岫秦雲不相隔
傍城積水晚更明照見綸巾倚樓客
李白上天不可呼陰晴變化還須臾
獨撫危闌詠竒句滿樓風月不枝梧

高郵城

元 揭傒斯

高郵城城何長城上種麥城下種桑
昔日鐵不如今為

耕種場但願千萬年盡四海外為封疆桑陰陰麥茫茫
終古不用城與隍

五言律

登襄陽城

唐杜審言

旅客三秋至層城四望開楚山橫地出漢水接天回冠
蓋非新里章華即舊臺習池風景異歸路滿塵埃

登潤州城

唐丘為

天末江城晚登臨客望迷春潮平島嶼殘雨隔虹霓鳥

與孤帆遠煙和獨樹低鄉山何處是目斷廣陵西

江城晚眺

唐張祜

重檻構雲端江城四鬱盤河流出郭靜山色對樓寒浪
草侵天白霜林映日丹悠然北江思樹杪幾檣竿

登杭州城

唐鄭谷

漠漠江天外登臨返照間潮來無別浦木落見他山沙
鳥晴飛遠漁人夜唱聞歲窮歸未得心逐片帆還

夏日晚霽與崔子登周襄故城

宋 梅堯臣

雨脚收不盡斜陽半古城獨攜幽客步閒閑老農耕寶
氣無人發陰蟲入夜鳴余非避喧者坐愛遠風清

再至都城

宋 晁冲之

崢嶸花萼西清曉望猶迷御路紅塵合宮槐碧瓦齊夾
城知輦過複道覺香低中使傳宣入千門避馬蹄

郭外

明 薛蕙

郭外平蕪迴谿邊小徑斜客行迷野竹鶯語隔林花多

景每難遇孤遊還自嗟佳期竟何許脈脈向春華

七言律

和樊使君登潤州城樓

唐劉長卿

山城迢遞敞高樓露冕吹鏡居上頭
春草連天隨北望夕陽浮水共東流
江田漠漠全吳地野樹蒼蒼故蔣州
王粲尚為南郡客別來何處更銷憂

河陰新城

唐雍陶

高城新築壓長川虎踞龍盤氣色全
五里似雲根不動

一重如月暈長圓
河流暗與溝池合
山色遙將埤堥連
自有此來當汴口
武牢何用鎖風煙

高郵城曉望

元 薩都拉

城上高樓城下湖
城頭畫角曉鳴鳴
望中燈火明還滅
天際星河澹欲無
隔水人家暗楊柳
帶霜鳧雁起菰蒲
短衣匹馬非吾事
擬向煙波覓釣徒

郡城晚望覽臨武堂故基

元 張翥

全晉山川氣象開
滿城煙樹擁樓臺
土風舊有堯時俗

人物今無楚國材
千嶂晚雲原上合
兩河秋色鴈邊來
昔賢勝賞空陳迹
落日登臨畫角哀

五言絕句

聖明朝

唐

張仲素

九陌祥煙合
千春瑞月明
宮花將御柳
先發鳳凰城

城上

唐

白居易

城上萼萼鼓朝衙
復晚衙為君慵
不出落盡繞城花

七言絕句

同王員外隴城絕句

唐錢起

三軍版築脫金刀
黎庶翻慚將士勞
不憶新城連嶂起
惟驚畫角入雲高

安仁巷口望仙人城

唐顧况

樓臺采翠遠分明
聞說仙家在此城
欲上仙城無路上
水邊花裏有人聲

北郭

宋文同

繞樹垂蘿蔭曲堤
暖煙深處亂禽啼
何人來此共攜酒

可惜拒霜花一谿

泗州東城晚望

宋秦觀

渺渺孤城白水環，舳舻人語夕霏間。
林梢一抹青如畫，應是淮流轉處山。

過浦城

元薩都拉

人家雞犬隔煙嵐，城郭微茫見塔尖。
一片輕雲籠馬首，熟梅時節雨纖纖。

泊皖城三日懷白下故人

明宋珏

城依碎石岸依沙行遍城南之酒家日暮客愁如白下
蘆花風起似楊花

御定佩文齋詠物詩選卷一百二十四

欽定四庫全書

御定佩文齋詠物詩選卷一百二十五

橋梁類

五言古

賦得橋

梁
簡文帝

浮梁既衝險通波信可陵
乘空寫渭石跨岸擬河水斜
關隱濁霧布影入清澗
方知歌綠水無待榜蒼鷹

石橋

簡文帝

惠子臨濠上秦王見海神寫虹便欲飲圖星逼似真

夕望江橋示蕭諮議楊建康江主簿

梁
何遜

夕鳥已西度殘霞亦半消風聲動密竹水影漾長橋旅
人多憂思寒江復寂寥爾情深鞏洛予念返漁樵何因
適歸願分路一揚鑣

石橋

梁
庾肩吾

秦王金作柱漢帝玉為闌仙人飛往易道士出歸難

渡岸橋

陳
陰 鏗

畫橋長且曲，傍險復憑流。
寫虹晴尚飲，圖星晝不收。
跨波連斷岸，接路上危樓。
欄高荷不及，池清影自浮。
何必橫南渡，方復似牽牛。

和庾司水修渭橋

北周
王 褒

東流仰天漢，南渡似牽牛。
長堤通甬道，飛梁跨造舟。
使者開金堰，太守擁河流。
廣陵侯濤水，荆峽望陽侯。
波生從故舶，沙漲湧新洲。
天星識辯對，檢玉應沈鈎。
空悅浮

雲賦非復採蓮謳

忝在司水看治渭橋

北周庾信

大夫叅下位司職渭之陽富平移鐵鎖甘泉運石梁跨
虹連絕岸浮鼉續斷航春洲鸚鵡色流水桃花香星精
逢漢帝釣叟值周王平堤石岸直高堰柳陰長羨言杜
元凱河橋獨舉觴

題石橋

唐韋應物

遠學臨海嶠橫此莓苔石郡齋三四峯如有靈仙跡方

愁暮雲滑始照寒池碧自與幽人期逍遙竟朝夕

苦竹橋

唐
柳宗元

危橋屬幽徑繚繞穿疎林迸籜分苦節輕筠抱虛心俯
瞰涓涓流仰聆蕭蕭吟差池下煙日嘲哢鳴山禽諒無
要津用棲息有餘音

棲賢院三峽橋

宋
朱子

兩岸蒼壁對直下成斗絕一水從中來湧滴知幾折石
梁據其會迎望遠明滅倏至走長蛟捷來翻素雪聲雄

萬霹靂勢倒千喘嶮足掉不自持魂驚詎堪說老仙有
妙句千古擅竒崛尚想化鶴來乘流弄明月

七言古

高橋行

明
曹學佺

東西有湖相競白只隔湖中一片石石橋湖水照人行
幽意盈盈動日夕坐來水滿月亦多月在兩湖誰作波
波香羨煞採蓮曲却見長江帆影過

五言律

賦橋

唐張文琮

造舟浮渭日鞭石表秦初星文遙瀉漢虹勢尚凌虛已
授文成履空題武騎書別有臨濠上棲偃獨觀魚

詠橋

唐李嶠

烏鵲填應滿黃公去不歸勢疑虹始見形似鴈初飛妙
應七星制高分半月輝秦皇空構石仙島遠難依

天津橋東旬宴得歌字韻

唐張九齡

清洛象天河東流彤勝多朝來逢宴喜春盡却妍和泉

鮑歡時躍林鶯醉裏歌賜恩頻若此為樂奈人何

登平望橋下作

唐 顏真卿

登橋試長望望極與天平際海蒹葭色終朝鳧鴈聲近
山全髣髴遠水忽微明更覽諸公作知高題柱名

離蕪湖至觀頭橋

宋 梅堯臣

江口泊來久菰蒲長舊苗爭雛洲鵲鬪遺子浦魚跳宿
岸欣逢戍歸船競趁潮時時望鄉樹已恨白雲遙

過青城題索橋

宋 范成大

織簟勻鋪面排繩強架空染人高曬帛獵戶遠張量薄
薄難承雨翻翻不受風何時將蜀客東下看垂虹

河橋成

金李俊民

預積他山木重新兩岸隄龍依天上卧虹傍水心低不
假鞭秦石何勞立蜀犀落成應有日誰向柱先題

宿三閘

元貢奎

小市人家簇扁舟晚色清山危傾地勢開險著溝聲岸
石篙存迹谿風樹引情明朝順流去萬里眼初明

寶帶橋

元僧善住

運得他山石還將石作梁
直從隄上去橫跨水中央
白鷺下秋色蒼龍浮夕陽
濤聲當夜起併入榜歌長

青橋

明楊慎

閣道盤雲棧郵亭枕水涯
猿猱臨客路雞犬隔仙家
風起青丘樹春迷玉洞花
旅懷今日豁停憶問褒斜

高粱橋

明袁宗道

覓寺休辭遠逢僧不厭多
一泓春水疾十里柳風和香

霧迷車騎花枝耀綺羅
半生塵土胃滌浣賴清波

五言排律

和李相公留守題漕上新橋六韻

唐白居易

選石鋪新路安橋壓古堤
似從銀漢下落傍玉川西
影定闌干倒標高華表
齊煙開虹半見月冷鶴雙棲
材映夔龍小功嫌元凱
低從容濟世後餘力及黔黎

七言律

陪李七司馬阜江上觀造竹橋即日成往來之
人免冬寒入水聊題短作簡李公

唐
杜甫

伐竹為橋結構同褰裳不涉往來通天寒白鶴歸華表
日落青龍見水中顧我老非題柱客知君才是濟川功
合歡却笑千年事驅石何時到海東

曉上天津橋閒望偶逢盧郎中張員外攜酒同

傾

唐
白居易

上陽宮裏曉鐘後天津橋頭殘月前空闊境疑非下界
飄飄身似在寥天星河隱映初生日樓閣蔥蘢半出煙
此處相逢傾一盞始知地上有神仙

天津橋

唐白居易

津橋東北斗亭西到此令人詩思迷眉月晚生神女浦
臉波春傍窈窕娘堤柳絲嫋嫋風縹縹出草縷茸茸雨剪齊
報道前驅少呼喝恐驚黃鳥不成啼

之石橋

宋韓維

聞道西橋水樹間不辭驅馬涉風煙
疎籬老屋臨官道瘦棘荒茅蔽石田
欲下鳴鴉盤木末遠來驚雉落山前
瓢中幸有邛醪美不怕春寒雨滿川

過宜福橋

宋楊萬里

水鄉澤國最輸農無旱無乾只有豐碧豆
密爭桑蔭底綠荷雜出稻花中是田是沼
渾難辨何地何邛不一同若使明年無種子
却愁間煞雨和風

惠安橋

元貢奎

涔陽山水壯南州，千尺飛梁連去郵。
蛟鱷翻濤聲吼夜，虹霓分雨氣橫秋。
險疑雲棧通車馬，高比銀河挾女牛。
鉅萬功成書太史，絕勝舟楫濟中流。

過長橋書所見

元曹伯啓

柳如青幟導姑蘇，橋若垂虹飲太湖。
渺渺天光接波浪，淒淒秋色上菰蒲。
行囊只剩新詩稿，身世端如古畫圖。
獨倚危闌追往事，鴈銜霜信下平蕪。

次韻馬昂夫總管飲仙橋詩

元僧大訢

鐵鎖高懸隔杳冥仙橋有路上瑤京夜涼暗覺潛蛟動
曉色微看素練平坤極尚遺神禹力山靈空識祖龍名
爛柯舊事憑誰問石柱題詩薜荔生

海子橋

明 曾 棨

鯨海遙通一水長滄波深處石為梁平鋪碧甃連馳道
倒瀉銀河入苑牆晴綠乍添垂柳色春流時泛落花香
微茫迴隔蓬萊島不放飛塵入建章

五言絕句

板橋

唐錢起

靜宜樵隱度遠與車馬隔有時行樂來喜遇歸山客

板橋

唐司空曙

橫遮野水石前帶荒邨道來往見行人清風柳陰好

上洛橋

唐李益

金谷園中柳春來似舞腰何堪好風景獨上洛陽橋

方橋

唐韓愈

非閣復非船可居兼可過君欲問方橋方橋如是作

梯橋

韓愈

乍似上青冥初疑躡齒齒自無飛仙骨欲渡何由敢

青橋夜宿

明楊慎

驛亭臨白水石榻滿蒼苔遠客渾無夢江聲枕上來

七言絕句

臯橋

唐皮日休

臯橋依舊綠楊中閭里猶生隱士風惟我到來居上館
不知何道勝梁鴻

奉和臯橋

唐
陸龜蒙

橫絕春流架斷虹，憑欄猶想五噫風。
今來未必非梁孟，却是無人繼伯通。

乘公橋作

宋
林逋

晚峯橫碧樹梢紅，數榜漁罾水影中。
憶得江南曾看著，巨然名畫在屏風。

過神助橋亭

宋
楊萬里

下橋渾將野店看，只驚脚底水聲寒。
不知竹外長江近

忽有高梳出寸竿

曉坐荷橋

楊萬里

碧玉山邊白鳥鳴
綠楊風裏翠荷聲
草花踏碎教人惜
為勒芒屨款款行

橫橋阻水

元 胡天游

浮江積雨水連天
楊柳依依一釣船
白髮篙師多意氣
向人先索渡江錢

泊垂虹橋口占

元 顧瑛

三江之水太湖東激浪輕舟疾若風
白鳥羣飛煙樹末
青山多在雪花中

其二

江風吹颿倏數里
野花笑人應獨行
更須對雪開金觥
要聽鄰船搗玉箏

楓橋夜泊

明
高啓

烏啼霜月夜寥寥
回首離城尚未遙
正是思家起頭夜
遠鐘孤棹宿楓橋

望丹陽郭經楊子橋

明 銜 炳

暖風晴日丹陽郭處處東風是舊遊
記得杏花寒食候
紫簫紅袖宿江樓

長橋

明 蘇大年

綠陰高樹映清潭一舸夷猶酒半酣
最愛西城城下路
長橋煙雨似江南

題吳江垂虹橋

明 林 鴻

雲帆秋晚過垂虹落日鯨波動遠風
欲借仙家遼海鶴

月明吹笛水晶宮

華陰駐馬橋

明程本立

絕谷層關路屈盤斜岡側嶂石巒岼今朝駐馬橋邊立
華嶽三峯正面看

斷橋分手

明史鑑

近水人家半掩扉兩山樓閣尚斜暉斷橋無數垂楊柳
總被遊人折漸稀

于役江鄉歸經板橋

明楊慎

千里長征不憚遙
解鞍明日問歸橈
真如謝朓宣城路
南浦新林過板橋

板橋

明
曹學佺

兩岸人家傍柳條
玄暉遺跡自蕭蕭
曾為一夜青山客
未得無情過板橋

御定佩文齋詠物詩選卷一百二十五

欽定四庫全書

御定佩文齋詠物詩選卷一百二十六

隄岸類

五言古

登隄望水

梁
元帝

驅馬河隄上非謂城隅遊懷山殊未已徒然勞九愁旅
泊依邨樹江槎擁戍樓高岸翻成浦曲港反通舟棗野
良知歎瓠河今可倚願假宣尼道泗水却橫流

登武昌岸望

陳陰鏗

遊人試歷覽舊跡已丘墟
巴水縈非字楚山斷類書荒
城高仞落古柳細條疎
煙蕪遂若此當不為能居

七言古

隄下

宋孔武仲

隄下人家喧笑語高揭青帘推瓦鼓
黃流滾滾經簷甍
一任征夫作船苦綠榆覆水平如盃
前灣旋放水頭來
聲如怒虎著船底玉石磊砢相喧
歷黃河雖斷隨渠急

舟楫舒遲行旋澀獨上平隄望遠天衣裘已畏西風入

汴隄行

宋 孔平仲

長隄杳杳如絲直隱以金椎密無迹當年何人種綠榆
千里分陰送行客波間交語船上下馬頭一別人南北
日輪西入鳥不飛從古舟車無斷時

太平隄行

明 皇甫汈

太平門外古崇隄嘉樹扶疎夾路垂負郭盡為芳草地
沿河直遶白雲司當時王貢總仙才况是承恩北闕來

御史府中烏半宿尚書門下騎雙迴青山幾度朝陵節
元水曾流被洛杯鳴珂再過平沙道問舍多為後來少
已看奏賦甘泉宮每憶傳詩臨海嶠驚心歲序易經春
舉目湖山宛自新含香不覩遊蘭客息影徒逢愛樹人
由來聚散皆無定欲寄相思那可因

七言律

吳興新隄

唐

朱慶餘

春隄一望思無涯樹勢還同水勢斜深映菰蒲三十里

晴分城郭幾千家
謀成既不勞人力
境遠偏宜隔浪花
若與青山長作固
汀洲肯恨柳絲遮

蘇隄春曉

明 聶大年

樹煙花霧遶隄沙
樓閣朦朧一半遮
三竺鐘聲催落月
六橋柳色帶棲鴉
綠窗睡覺聞啼鳥
綺閣粧成喚賣花
遙望酒旗何處是
炊煙起處有人家

五言絕句

入朝洛隄步月

唐 上官儀

脈脈廣川流，驅馬歷長洲。
鵲飛山月曙，蟬噪野風秋。

七言絕句

隄上行

唐
劉禹錫

春隄繚繞水徘徊，酒舍旗亭次第開。
日晚上樓招估客，峨舸大舩落颿來。

魏王隄

唐
白居易

花寒嬾發鳥慵啼，信馬閒行到日西。
何處未春先有思，柳條無力魏王隄。

隄上行

唐張籍

酒旗相望大隄頭
隄下連檣隄上樓
日暮行人爭渡急
槳聲伊軋滿中流

其二

江南江北望烟波
入夜行人相應歌
桃葉傳情竹枝怨
水流無限月明多

汴隄

宋劉子翬

參差歌吹動離舟
宮女張帆信浪流
轉盡柳隄三百曲

夜橋燈火看揚州

御定佩文齋詠物詩選卷一百二十六

欽定四庫全書

御定佩文齋詠物詩選卷一百二十七

舟類

四言古

舟楫銘

漢

李尤

舟楫之利譬猶與馬輦重歷遠以濟天下相風視波窮
究川野安審懼慎終無不可

舟贊

宋

王叔之

致遠任重各因所由陸則乘車水惟用舟弱楫輕棹利
涉濟求緬彼漁父鼓枻清謳

五言古

詠輕利舟應臨汝侯教

梁 王 筠

君侯節輕利搖蕩邁飛雲凌波漾鷁彩汎水渙蛟文電
流已光絕鳥逝復超群倏忽方千里戀茲歧路分

別韋諒賦得江湖汎別舟

陳 張正見

千里潯陽岸三翼木蘭船鷁汎青鳧後雞鳴白鷺前涵

花沒淺纜帶葉動深艫不言朝夕水獨自限神仙

賦得雪映夜舟

張正見

黃雲迷鳥路白雪下鳧舟分沙映冰浦照鶴聚寒流檣
風吹影落纜錦雜花浮船梁若是桂翻如月照秋

權歌行

隋
蕭岑

桂酒既潺湲輕舟亦乘駕鼓枻何所吟吟我皇唐化容
與滄波中淹留明月夜

泊舟貽潘少府

唐
儲光羲

行子苦風潮維舟未能發宵分卷前幔卧視清秋月四
澤葦葦深中洲煙火絕蒼蒼水霧起落落疎星沒所遇
盡漁商與言多楚越其如念極浦又以思明哲常若干
里餘况之異鄉別

李兵曹壁畫山水各賦得桂水帆

唐
李
頎

片帆浮桂水落日天涯時飛鴈看共度閒雲相與遲長
波無曉夜泛泛欲何之

三韻

唐
杜甫

蕩蕩萬斛船影若搖白虹起檣必椎牛挂席集衆功自
非風動天莫置大水中

誌峽船具詩

唐
王周

舫

制之居首尾俾之辨斜正首動尾聿隨斜取正為定有
如提吏筆有如執時柄有如秉師律有如宣命令守彼
方與直得其剛且勁既能濟險艱何畏涉遼寬招招俾

作主汎汎實司命風鳥媿斟酌畫鷁空輝映古人存豐
規猗歟聊引證

船

用之大曰艦冠乎小者楫通津既能濟巨浸即橫涉身
之使者頰虎之擘者爪魚之撥者鬣弩之進者筴此實
為相須相須航一葉

賦

箭飛峽中水鋸立峽中石峽與水為隘水與石相擊瀆

為生險艱聲甚發霹靂三老航一葉百丈空千尺蒼黃
徒爾為倏忽何可測篙之小難制舳之獨有力猗嗟舳
之為彬彬堅且直有如用武人森森轟戈戟有如敢言
士落落吐胷臆拯危居坦夷濟險免兢惕彼哲匠心
俾其來者識

百丈

少嘗侍先人餘閒誦白氏始得入峽詩深味作詩旨云
有萬仞山云有千丈水自念坎壈時尤多兢慎理山東

峽如口水激石如齒孤舟行其中薄水猶坦屣屣顏屹
焉立洶湧勃然起百丈為前牽萬險即平砥破之以資
篙績之以麻泉礪之堅以節引之直如矢杼軸連半空
長短隨兩涘鐵銷枉馳名錦纜謾稱美長繩豈能繫朽
索何足擬苟非綏之為胡可力行此

吳江放船至楓橋灣

宋

薛季宣

短篷負長虹破簾挂明月風馬座中生天幕波間出高
城多隱映遠岫攬羅列少小泛吳江始識仙凡別

江船二詠

元王暉

篷

尺篲編黃蘆節密數須隻長短隨所宜張弛易為摘一
傍繫脚索若網網總緝北人布為帆南俗篷以荻舟師
貪重載高挂借風力順流與溯波巨鷁添羽翮望從遠
浦來一片雲影黑亂衝渚煙開重帶江雨濕百里不終
朝用舍從順適夕陽見晚泊堆壘紛襞積水雖物善利
其助乃爾益

艚

江船一巨魚艚拖乃尾鬣當其淵水深棹弱不救之故
令施航後前與棹力合濟川具有五此物乃其甲一聲
天際來欸乃中流發或浮大河東竝岸行若狎終朝卧
舳間蘭槳但空插緬懷剡木皇智創萬古法

過桐廬漏港灘示舟人

元
鮮于樞

驚流激長灘百折怒未已篙師與水爭退尺進纔咫尺
窮解衣下力排過乃止惟時春冬交冰雪寒墮指我時

卧舟中起視穎有泚迂踈一何補辛苦愧舟子

遠浦歸帆

元陳孚

日落牛羊歸渡頭動津鼓煙昏不見人
隱隱數聲櫓水波忽驚搖大魚亂跳舞北風一何勁帆飛過南浦

賦得山逐放舟遲送王主簿

明楊基

舟行山亦移山盡舟亦住青山無故人行
人自來去初辭逶迤谷復接參差樹柁轉
暮色分帆駛秋嵐度俄停風暫弱既遠煙
重護別意即山情依君屢回顧

七言古

附長短句

泛小輪

唐白居易

水一塘輪一隻
輪頭漾漾知風起
輪背蕭蕭聞雨滴
醉卧船中欲醒時
忽疑身是江南客

其二

船緩進水平流
一莖竹篙別船尾
兩幅青幕覆船頭
亞竹亂藤多照岸
如從鳳口向湖州

大舟

宋王令

大舟無風船不舉
小舟傍入青冥去
舟中漁子呼且歌
夜半鬪魚誰得多

謝朱宰借船

宋陳造

書生祿邀空自憐
三年官滿囊無錢
身如絆驥心千里
安得一舸西風前
令君磊落濟川手
畱滯亦憐窮獨叟
大舟百尺影白虹
借我搬家我何有
函牛之鼎著雞肋
涓滴渠須瓠五石
劣畱兩席寘圖書
葦石囊沙壓搖兀
典衣買酒餉三老
搥鼓鳴鑼人看好
相過重讀借船帖

我自盧胡君絕倒

峽中得風挂帆

宋 楊萬里

樓船上水不寸步兩山慘慘愁將暮一聲霹靂天欲雨
隔江草樹忽起舞風從海南天外來怒吹峽山山倒開
百夫絕叫椎大鼓一夫飛上千尺桅布帆挂了却袖手
坐着水上鷺毛走

東西船

宋 方岳

昨日東船使風下突過乘興快於馬今日西船使風上

適從何來急於浪東船下時西船怨西船上時東船羨
篙師勞苦自相覺明日那知風不轉推蓬一笑奚爾為
怨遲羨速無休時沙頭漠漠杏花雨依舊年時檣燕語

野水孤舟

宋 梁 棟

前邨雨過溪流亂行路瀰漫都間斷孤舟盡日少人來
小舟繫在垂楊岸主人空有濟川心坐見門前水日深
袖手歸來茅屋下任他鷗鳥自浮沉

牽舟行

元 貢 奎

河水沄沄流不已
汜流牽船魚貫尾
怒風卷地漲黃塵
白日茫茫霧雲起
前船纜影百丈微
號呼併力行如飛
後船纜斷勢一失
汗身滿足不相及
須臾十里回天風
舉檣撇柁懸高蓬
誰知日暮泊處所
成功却與前船同
篙師接語告勞苦
僕從亦復譏途窮
持樽傲坐且引醉
悲喜豈足關吾躬
君不見何獨人生行
與止請君萬事推此理

遠浦歸帆

明宣宗

斜陽欲挂晴川樹
丹霞遠映瀟湘浦
洞庭湖上接星沙

萬里歸舟自何處雲帆縹緲天際來勢壓滔天雪浪摧
須臾已達漢江曲江聲洶湧如鳴雷漢陽城頭夜吹角
輒從鸚鵡洲邊泊長笛一聲山月低殘燈數點江雲薄
西蜀滇南與海通浮波來往自無窮暮天已捲三湘霧
曉日還懸七澤風突兀危樓瞰江水臨眺何人頻徙倚
寒鴉飛盡澹煙收浩蕩遙空淨如洗

雪蓬圖詩為蔡子堅作

明 蕭 規

吳榜何年過東澗帶得山陰一篷雪春風浩浩吹不消

夜月娟娟照偏潔雪蓬主人且好奇載客日遊隨所之
呼酒恒持金鑿落對花每品玉參差咿啞柔櫓渡湖曲
驚起鴛鴦不成宿汎汎斜當瓊樹移搖搖直傍銀槎轟
棹歌齊發聲抑揚高情獨愛水雲鄉從遊酬酢誰最密

儒雅人稱馬季常

謂馬公振也

水月舫為奚川錢竹深賦

明

湯穎勳

太乙真人蓮一瓣飄飄萬里來天漢移入江南錦繡窠
蘭橈桂槳空凌亂長鯨對舞碧紗窻缺兔潛窺紫絲幔

黍箴浮香春可斟蒲帆颺彩風堪喚老興閒攄曲數謳
幽情緩發琴三嘆古蹟多因潮洗平遠山忽被雲遮斷
曩時螃蟹落錢昆今日鱸魚到張翰莫令惠子識逍遙
且拉盧生遊汗漫冰壺影裏塞鴻飛海鏡光中沙鳥散
好天良夜屬君多大壑深谿留我半乾坤正乏濟川才
忍教獨繫黃蘆岸

王有恒聽雨篷

明僧妙聲

江南雨多春漠漠蘆蔭中寬可淹泊坐聽蕭瑟復琮琤

若在洞庭張廣樂木蘭之楫青翰舟斜風細雨不須憂
筆牀茶竈便終日知我獨有滄浪鷗廿年攜書去鄉國
蕪城草深歸未得援琴時作廣陵散魚龍出聽天吳泣
江湖適意無前期身如行雲隨所之平山堂上看春色
還憶江南聽雨時

五言律

七夕泛舟

唐

盧照鄰

河葭肅徂暑江樹起初涼水疑通織室舟似泛仙潢連

梳渡急響鳴棹下浮光
日晚菱歌唱風煙滿夕陽

舟

唐李嶠

征棹三江暮連檣萬里迴
相烏風際轉畫鷁浪前開
羽客乘霞至仙人弄月來
何當同傳說特展巨川材

泛永嘉江日暮迴舟

唐張子容

無雲天欲暮輕鷁大江清
歸路煙中遠迴舟月上行
傍潭窺竹暗出嶼見沙明
更值微風起乘流絲管聲

放船

唐杜甫

送客蒼谿縣山寒雨不開直愁騎馬滑故作泛舟迴青
惜峰巒過黃知橘柚來江流大自在坐穩興悠哉

舟中

杜甫

風餐江柳下雨卧驛樓邊結纜排魚網連檣並米船今
朝雲細薄昨夜月清圓飄泊南庭老祇應學水仙

賦得的的帆向浦

唐司空曙

向浦參差去隨波遠近還初移芳草裏正在夕陽間隱
映迴孤驛微明出亂山向空看不盡歸思滿江關

秋夜船行

唐嚴維

扁舟時屬暝，月上有餘輝。
海燕秋還去，漁人夜不歸。
中流何寂寂，孤棹也依依。
一點前邨火，誰家未掩扉。

泛舟

唐戴叔倫

風軟扁舟穩，行依綠水隄。
孤樽秋露滑，短棹晚煙迷。
夜靜月初上，江空天更低。
飄飄信流去，誤過子猷谿。

五瀉舟

唐皮日休

何事有青錢，因人買釣船。
閑容兼餌坐，深許共蓑眠。
短

好隨朱鷺輕堪倚白蓮自知無用處却寄五湖仙

放船

宋 朱子

浩蕩清江水依微綠樹風解維春雨外弭棹夕陽中江
草生新徑巖花點舊叢詩翁不愁思逸興杳何窮

放船

宋 楊萬里

岸岸人家住門門水面開老翁扶杖立稚子看船來一
夜鳴春雨諸灘漲綠醅順流行自快更著北風催

小舟

宋 趙師秀

小舟隨處去幽意日相親
野草如荷葉輕鷗似逸人
閒思此湖水曾洗幾京塵
甚欲營漁屋空虛未有因

歸舟

元 揭傒斯

汀洲春草徧風雨獨歸時
大舸中流下青山兩岸移
鴉啼木郎廟人賽水神祠
波浪爭掀舞艱難久自知

賦得天際舟送張孟功治河

元 傅若金

日下行人發春晨去鷁催
纜侵斜月解帆向斷雲
開度鳥窺書卷垂虹映酒杯
尋源不可盡奉使幾時回

雨篷

明 高啓

楚雨滿汀洲，瀟瀟灑灑客舟。
夢驚孤枕夜愁掩，一篷秋葦。
葉寒相戰，灘聲暗共流。
此時湘浦上，同聽只沙鷗。

賦得江帆送蔣氏歸儀真

明 施漸

挂席發秋早，微風已滿檣。
中流片影去，遠水一舟將。
海雨忽來重，江雲相帶涼。
知投孝廉宅，三徑接蒼茫。

舟泊

明 僧善學

江靜雨初收，湖光滑似油。
岸如隨棹轉，山欲趁波流。
牽

興多浮苻忘機足野鷗夜聞漁父笛吹破一天秋

五言排律

浮槎

唐駱賓王

昔負千尋質高臨九仞峰貞心凌晚桂勁節掩寒松忽
值風颺折坐為波浪衝摧殘空有恨擁腫遂無庸渤海
三千里泥沙幾萬重似舟飄不定如梗泛何從仙客終
難託良工豈易逢徒懷高乘器誰為一先容

賦得天際識孤舟

唐薛能

斜日滿江樓天涯照背流
同人在何處遠目認孤舟
帆省當時席歌聞舊日謳
人浮津濟晚棹泛沈寥
秋情澗欣全見歸遲恹
久遊離居意無限貪此望難休

賦得濟川用舟楫

唐胡權

渺渺水連天歸程想幾千
孤舟辭曲岸輕楫濟長川
迴拍波濤雪迴瞻島嶼煙
心迷滄海上目斷白雲邊
泛濫雖無定維持且自專
還如聖明代理國用英賢

七言律

小舫

唐
白居易

小舫一艘新造了，輕裝梁柱安蓬深。
坊靜岸遊應遍，淺水低橋去盡通。
黃柳影籠垂棹月，白蘋香起打頭風。
慢牽欲傍櫻桃泊，借問誰家花最紅。

夜船

唐
韓偓

野雲低迷煙蒼蒼，平波輝目如凝霜。
月明船上簾幕捲，露重岸頭花木香。
村遠夜深無火燭，江寒坐久換衣裳。
誠知不覺天將曙，幾簇青山鴈一行。

槎

唐 吳融

浪痕龍跡老歌危，流落何年別故枝。
歲月空教苔蘚積，芳菲長倩薜蘿知。
有文在朽人難識，無蠹藏心鳥莫窺。
家近滄浪從泛去，碧天消息不參差。

舟行即事

唐 杜荀鶴

年少鬢鬚雪欲侵，別家三日幾般心。
朝隨賈客憂風色，夜逐漁翁宿葦林。
秋水鷺飛紅蓼晚，暮山猿叫白雲深。
重陽酒熟茱萸紫，却向江頭倚棹吟。

帆

唐
徐夔

豈勞孤棹送行舟
輕過天涯勢未休
斷岸曉看殘月挂
遠灣寒背夕陽秋
波平直可追飛箭
風健還能泝急流
幸遇濟川恩不淺
北溟東海更何愁

舟中曉賦

宋
陸游

木落霜清水鳥呼
扁舟夜泊古城隅
吹殘畫角鐘初動
低盡寒空斗欲無
浪迹已同鷗境界
遠遊方羨鴈程途
高檣健席從今始
歷徧三江與五湖

閭門外登谿船

宋 楊萬里

步下新船試水初打頭攬載適逢余一椽板屋纔經雨
兩面油窗好讀書刺買春園紅芍藥亂篔簹几竹籬條
清谿浮取松亭子賞遍千山不要驢

方寺丞舵子初成

宋 劉克莊

船成莫厭野人過久欲從公具釣蓑積雨晴來湖面闊
殘花落盡樹陰多新營小店皆依柳舊有危亭尚隔荷
所恨前峰含暝色不然和月宿煙波

仙槎

元 謝宗可

曾作河源萬斛舟塵根已斷卧蛟蚪無心下土承煙雨
有路層霄犯斗牛破浪遠衝銀漢曉凌風徑渡碧天秋
歸來帶得支機石誰識人間博望侯

蓮葉舟

謝宗可

穩棹紅衣泛渺茫風帆浪檝水雲鄉曉撐太華半峰月
晚載西湖十里香藕放雪絲應作纜荷歌翠柄若為檣
不須更捧金仙足太乙真人夢正涼

題風雨歸舟圖

元 丁鶴年

昔向滄浪寄獨醒中流風雨正揚舲江空風捲潮頭白
野曠雲迷峴首青挂席正思遺珮浦推篷已過濯纓亭
襄陽耆舊今安在撫几長歌對畫屏

題煙波泛舟圖

明 楊慎

舊遊憶鼓湘湖棹日淨風微江練平小艇曲穿花底出
游魚相伴鏡中行別來漫想心徒切畫裏重看眼亦明
素石蒼松是何處願從巢父濯冠纓

題王煮石推篷圖

明 錢 宰

粲粲晴林截素霓，夢回何處覓新題。
畫檐壓檻江南屋，短棹推篷雪後谿。
落月欲分花上下，春風不隔柳高低。
何當一見冰霜表，放筆孤山煙水西。

雪航

明 朱之蕃

江天凝望六花飛，控帶峰巒玉作圍。
獨棹扁舟凌浩渺，更褰篷幔弄霏微。
鷗鷺萬點衝蘆起，翔鶴千羣挾浪歸。
煮酒烹鮮漁唱發，披裘醉卧失寒威。

踰風帆

明 王 鏞

江闊無憂風色橫
踰帆亦得達常程
畫屏峰下流觴過
碧玉波中曲尺行
已有煙霞供秀豁
更兼天日借晴明
眼中便是湘陰郭
取得秋醪定九成

帆影

明 錢希言

岸曲沙迴著處侵
半江落日半江陰
悠悠亂逐春潮上
漠漠還隨暮靄沈
曾帶斷鴉歸遠岫
又移殘月出疎林
誰憐獨倚危樓徧
目極天涯思不禁

五言絕句

葭川獨泛

唐
盧照鄰

倚棹春江上橫舟石岬前山暝行人斷迢迢獨泛仙

江南曲

唐
儲光羲

綠江深見底高浪直翻空慣是湖邊住舟輕不畏風

其二

日暮長江裏相邀歸渡頭落花如有意來去逐船流

北澗泛舟

唐
孟浩然

北澗流恒滿浮舟觸處通沿洄自有趣何必五湖中

江行

唐 錢 起

霽雲疎有葉雨浪細無花穩放扁舟去江天自有涯

其二

帆翅初張處雲鵬怒翼同莫愁千里路自有到來風

其三

睡穩葉舟輕風微浪不驚人居蘆葦岾終夜動秋聲

其四

艚慢生輕浪帆虛帶白雲客船雖狹小容得庾將軍

其五

風借帆方疾風迴棹却遲較量人世事不爽一毫釐

楊氏林亭探得古槎

唐

皇甫冉

千年古貌多八月秋濤晚偶被主人留那知來近遠

江行

唐

權德輿

孤舟漾暖景獨鶴下秋空安流正日晝淨綠天無風

昆明池泛舟

唐

賈島

一枝青竹榜泛泛綠萍裏不見釣魚人漸入秋塘水

江行

唐 陸龜蒙

酒旗菰葉外樓影浪花中碎帆張數幅惟待鯉魚風

艚聲

唐 崔塗

煙外橈聲遠天涯幽夢回爭知江上客不是故鄉來

古意

唐 闕名

長檣鐵鹿子布帆阿那起詫儂安在間一去數千里

月夜泛舟

唐 僧法振

西塞長雲盡南湖片月斜漾舟人不見卧入武陵花

羅噴曲

唐
劉采春

昨日北風寒牽船浦裏安潮來打斷纜搖艖始知難

出都來陳和所乘船上句

宋
蘇軾

我行無疾徐輕楫信溶漾船留村市鬧聞發寒波漲

權歌

宋
白玉蟾

朝吸西風餐夜弄明月舞萬頃碧琉璃下有玉清府

其二

黃昏杳無人孤江但翠竹惟有白鷺鷥伴我舟中宿

舟中

金王賓

河伯夸秋漲舟人健晚涼艚聲搖落月山氣鬱蒼蒼

題李漑之學士無倪舟

元虞集

三周華不注水影浸青天不上銀河去空明擊棹還

過高郵射陽湖雜詠

元薩都拉

雨濕鼓聲重風勻湖面平官船南北去帆影挂新晴

夕泛

元黃鎮成

秋淨山如拭江清一棹橫
挂帆延暮眺坐待潮生

過吳城山

明 汪廣洋

夜過吳城下不眠
閒倚窗泝流雙艚健
搖月下西江

鳧洲即事

明 魯鐸

見說瓜堪摘
閒過洲上來
小船風打去
半日未能回

古意

明 王弼

莫作河中水
願為水上舟
舟行有返棹
水去無回流

放船

明 方太古

放船春水慢繫纜柳條青去去江村近風吹魚網腥

舟夜

明 徐良彥

席邊即水底篷外是霜天偶得寒更向孤舟燭未燃

六言絕句

舟中

明 鮑楠

野渡溶溶春水夕陽點點寒鴉欸乃數聲何處行人一
棹天涯

七言絕句

泛洞庭

唐
尹恣

風光浙浙草中飄
日采熒熒水上搖
幸奉瀟湘雲壑意
山傍容與動仙橈

東魯門泛舟

唐
李白

日落沙明天倒開
波搖石動水縈回
輕舟泛月尋谿轉
疑是山陰雪後來

夔州歌

唐
杜甫

蜀麻吳鹽自古通
萬斛之舟行若風
長年三老長歌裏

白晝攤錢高浪中

五兩歌送張夏

唐 顧况

竿頭五兩風裊裊
水上雲帆逐飛鳥
送君初出揚州時
靄靄瞳瞳江溢曉

杭州回舫

唐 白居易

自別錢塘山水後
不多飲酒嬾吟詩
欲將此意憑回棹
與報西湖風月知

汴水舟行答張祜

唐 杜牧

千萬長河共使船聽君詩句倍淒然春風野岸明花發
一道帆檣畫柳煙

舟次汴題

唐朱景元

曲岸蘭叢鴈飛起野客維舟碧煙裏竿頭五兩轉天風
白日楊花滿流水

江上晚泊

唐左偃

寒雲淡淡天無際片帆落處沙鷗起水濶風高日復斜
扁舟獨宿蘆花裏

江帆

唐 羅鄴

別離不獨恨蹄輪渡口風帆發更頻何處青樓方凭檻
半江斜日認歸人

解維

唐 韋莊

又解征帆落照中暮程還過秣陵東二年辛苦煙波裏
贏得風姿似釣翁

淮中晚泊犢頭

宋 蘇舜欽

春陰垂野草青青時有幽花一樹明晚泊孤舟古祠下

滿川風雨看潮生

小舟

宋 林逋

舷低冷夏荷千柄底舫斜穿月半輪
一笠一蓑人穩坐
晚風蕭颭弄青蘋

戲贈米元暉

宋 黃庭堅

萬里風帆水著天麝煤鼠尾過年年
滄江靜夜虹貫月
定是米家書畫船

舟行絕句

宋 張耒

渡頭煙雨欲昏天
灣畔枯桑繫客船
風打篷窗秋浪急
一杯寒酒夜深眠

水口行舟

宋朱子

昨夜扁舟雨一蓑
滿江風浪夜如何
今朝試卷孤篷看
依舊青山綠樹多

題趙運管吟篷

宋徐照

飛塵難到碧波中
波上煙雲盡不同
吟斷不知鷺鷥起
汀花一半在船篷

宮詞

宋
花藥夫人

龍池九曲遠相通
楊柳絲牽兩岸風
長似江南好風景
畫船來去碧波中

襄陽絕句

金
王元粹

江雨初晴江漲發
涼風吹水波浪開
日暮津頭聞打鼓
越商巴賈卸船來

北關買舟

元
尹廷高

北關門外柳青青
閒寄江南第一程
別酒未闌山鳥唱

短篷撐夢過臨平

鯨背吟

海洋舟航所見
詩尾聯以古句

元 宋 无

尋鯨

萬艦同鯨在海心一時相離不知音
夜來欲問平安信
明月蘆花何處尋

抛砭

千斤鐵砭繫船頭萬丈灘中得挽留
想見夜深拋擲處
驚魚錯認月沈鉤

艚歌

浪靜船遲共一艚
艚歌齊起響連空
要將檀板輕輕和
又被風吹別調中

舟行

元
傅若金

漁家日暮亂收罾
欲及前舟苦未能
行盡綠楊三十里
隔河遙見驛亭燈

櫂歌

傅若金

攀柳莫攀當路柳
繫船須繫上風船
當路人行無好樹

上風浪小得安眠

題李成所畫江干帆影

元 黃公望

高閣崔巍瞰碧江
布帆歸去鳥雙雙
無邊樹色千峰秀
一片晴光落短窗

晚櫂

元 周 權

白水青林蕩曉晴
野禽樹底向人鳴
東風十幅蒲帆飽
快試淮南第一程

晚渡

周 權

離離野樹綠生煙灼灼山花爛欲然
酤酒人歸春渡寂
柳根閒繫夕陽船

松林午憇

元李士瞻

松林坐久午風清
谿水潺潺樹有聲
何處小舟撐柳外
來迎潮落去潮生

春帆

元李存

能舉人間萬斛舟
中流何用櫓聲柔
楊花兩岸東風軟
送盡斜陽更未收

揚州客舍

元 余闕

船頭澆酒祀神龍
手擲金錢撒水中
百尺樓船雙夾艚
唱歌齊上呂梁洪

欸乃歌詞

元 郭翼

上塘船行無斷頭
下塘船少好安流
兩岸青山天上坐
看山吹笛上杭州

三衢道中

元 張雨

大谿中道放船流
船壓山光瀉碧油
三百里灘歌枕過

買魚釀酒下嚴州

湖邨巷即事

元僧維則

竹根吠犬隔谿西
湖鴈聲高木葉飛
近聽始知雙櫓響
一燈浮水夜船歸

訪仙洞山舟次大谿口

元僧維則

窈窕仙家何處尋
夕陽明滅亂雲深
大谿橫斷青山合
一路風帆入樹林

與劉景玉安固泛舟

明徐淮

雲平水暖魚吹浪
雨潤泥香燕啄花
著面東風濃似酒
扁舟流過白鷗沙

春日懷江上

明 高啓

一川流水半邨花
舊屋南鄰是釣家
長記歸篷載春醉
雲籠殘照雨鳴沙

赴黃德讓招過南垞

明 徐賁

風暗沙邨晚漸平
相邀應得遂閒情
南塘水滿人來少
疎雨寒波一舸行

蘭谿棹歌

明 汪廣洋

野鳧晴蹋浪梯平
越上人家住近城
箬葉裹魚來換米
松舟一箇似梭輕

舟過黃陵廟

明 詹同

黃陵廟下倚船窗
水淺沙平屬玉雙
山外斷雲寒日晚
半篷殘雪下湘江

竹枝詞

明 楊慎

江頭秋色換春酒
江上楓林青又紅
下水上風來徃慣

一年長在馬船中



御定佩文齋詠物詩選卷一百二十七